

Debe nacional, un tema interesante den debate di ATIA

E benefitgala organisa dor di ATIA tabatin como punto culminante un debate entre e tres lidernan politico cu a wordo pidi pa duna nan opinion y vision riba puntonan cu ta importante pa futuro di pais Aruba. Debe nacional sin duda ta un tema interesante pa tende kico e pensamiento di e lidernan politico ta al respeto. E tres lidernan tabata sra. Evelyn Wever-Croes di partido MEP, Andin Bikker di PDR y Mike Eman, lider di AVP y alabes Prome Minister di pais Aruba.

Opinion general na final di e debate tabata cu Mike Eman, kende ta un orador talentoso, a sobresali grandemente riba e otro dosnan. E tabata domina e materia completamente y a sa di formula su vision den palabranan cla y cu evidencia.

Lider di MEP sra. Evelyn Wever-

Croes, a bisa di ta haya e tema cu ta regarda e debe nacional di Aruba uno dificil pa adresa y duna su opinion con e mester wordo atendi. Su argumento tabata cu e no tin un bista di e cifranan y e situacion real.

Un declaracion cu por lo menos bisa ta straño teniendo na cuenta cu e actual Gobierno a hereda e debe nacional aki di e Gobierno anterior ora a tuma gobernacion over.

E debe nacional inmenso aki a pone cu e actual Gobierno mester tuma accion rapido pa mehora e situacion y pa no laga cos sali for di man.

E contesta di e lider di MEP dilanti un sala yen di hende riba e tema aki ta uno increibel. Pasobra cu con cu bay bin e mester por na altura cu Aruba ta mihor para cu di con su Gobierno a lag'e atras. Su reaccion ta bira realmente preocupante si tene

na cuenta cu pa prome bes den 25 aña pais Aruba a entrega cuentanan anual.

E pregunta ta keda si sra. Wever-Croes no tin ningun experto cu por yude interpreta e cuenta anual di pais Aruba.

Corectamente Prome Minister Mike Eman a bisa cu for di inicio di su gobernacion, e ta biba cu e debe nacional aki. Su Gabinete a hered'e y mester a solucion'e. Un di e prome accionnan cu su Gobierno a haci tabata percura pa Bestuurskantor por a wordo usa atrobe pa no mester a paga 20 miyon y mas na huurmento inecesario di edificio di un solo famia.

Gabinete Mike Eman a start cu e Dialogo Social cu organisacionnan di dunador di trabou y di organisacion di empleadonan pa por enfrenta e enorme retonan cu Aruba ta confrontando. Gobierno a

baha e BBO cu 50% mirando cu introduccion di e belasting aki a percura pa un inflacion draconico.

Dor di a cort'e na mitat a percura p'e hendenan tabatin mas pa gasta estimulando asina e economia.

Danki na Gobierno AOV/AWW ta pagabel y un seguro general a keda introduci. Algo cu hopi pa papia di dje, pero Gabinete Mike Eman a percura pa el a bin. Scol y otro edificionan monumental decay ta wordo renoba. Inversionnan importante pasobra nan ta percura pa un mihor calidad di bida cu ta conduci na mas entrada.

Un punto esencial cu Prome Minister Mike Eman a trece dilanti ta cu su Gobierno a mantene e bon evaluacionnan di Fitch y Standard & Poor's. Un prestacion remarcabel cu poco pais por haci mescos.

Un observacion sumamente peculiar cu e lider di MEP a haci ta cu Gobierno mester bin cu mas incentivo, p.e. den forma di un investeringsaftrek pa inversionista na Playa.

Sra. Wever-Croes no tabata sa mes cu e actual Gobierno a reintroduci e investeringsaftrek cu MEP na 2007 a para.

Awe e investeringsaftrek ta bek y mester remarca cu e no tey solamente pa inversionistanan den Oranjestad, pero pa tur inversionista na Aruba.

E Dialogo Social, un iniciativa asina potente introduci dor di Gabinete Mike Eman, ta dunando resultado positivo. Prome Minister Mike Eman no ta papia so, e ta cumpli cu su promesanan y por demonstra esaki cu hechonan. Durante e debate su presentacion tabata fabuloso.